

REGIONAL NEWS BULLETIN

HEADLINES (MORNING)

1. Megawatt 120 siam chhuah theihna tur, Tlawng Hydel Project khuahna tur North Lungleng bula Tlawng kam ah Power Minister Pu F.Rodinglianan an hmalak dan tur thuthar thehdarhtute a hrilhfiah.
2. AH & Vety Minister Pu C. Lalsawivungan Saitual District Veterinary Hospital nimin khan a hawng.
3. 'Fit India Cycling Tuesdays' chu nimin atang khan Mizoramah pawh kalpui tan a ni.
4. Ramchhunga anti-pesticide bodysuit hmasa ber-hlotur laka loneitute venna tur Kisan Kavach tlangzarh a ni.

<><><>

POWER MINISTER

Megawatt 120 siam chhuah theihna tur, Tlawng Hydel Project khuahna tur a ruahman North Lungleng bul a Tlawng kam ah Power & Electricity Department Minister Pu F.Rodingliana, chuan nimin khan Press Conference neiin thuthar thehdarhtute a kawm a.

Power & Electricity Department Minister chuan Tlawng lui khuah tur chungchang sawifiain, tuna a lan danin Tlawng Hydro Electric Project (HEP) hi Aizawl bul hnai, North Lungleng bula siam tura ruahman a ni a, he Project hian 120 MW a pe chhuak thei dawn a ni. North Lungleng bul Tlawng luiah tuikhuah siam a ni ang a, a san zawng hi 120 meters tur a ruahman niin Village council ram engemaw zat tuikhua hian a chim dawn a. Amaherawh chu, khua leh in engmah a chim buai lo tur a ruahman a ni. Tuikhuah hian huan, lo, ram atan a la hman loh Ha 2888 a zau leh thlai chin nana hman Ha 187 vel a zau a chim pha tur a ngaih a ni. Tuikhuah hi Thenzawl piah Ramlaitui/Kawlhawk khua zawn vel thleng a huam dawn a ni.

He hna thawk tur hian tender koh tawh niin, tender evaluation tih mek a ni a. He hna hi tuang tak a thawh a nih chuan thla 4 vel awh tur a ngaih a ni a. Kum 2025 kum ai hawl velah chuan DPR hi peih fel beisei a ni a. DPR hi peih fel a nih veleh Mizoram sawrkar chuan he project tihlawhtling tur hian kut a thlak nghal dawn a ni.

Minister Pu F. Rodingliana tarlan danin he project hian tui 1009.6 Million Cubic Meter a khawl thei dawn a, he project atanga kawlpheha siam chhuah nan a tui hman te chu Tlawng lui tui kam zel tur venna tha takah a chang dawn a. Tun hnaia Aizawl khawpuiin thal laia harsatna kan tawh thin, Tlawng lui atanga tuithianghlim dukhawp pump chhoh tur awm loh thin avang a harsatna awm thin pawh a sutkiang theih beisei a nih thu a sawi bawk.

(DIPR)

<><><>

MBOCWWB

Mizoram chhunga mahni kut kawih thiamna leh insakna bakah hmasawna hnathawh kawnga nitina inhlawhfa thin ten hamthatna an neih theihna atana din, Mizoram Building and Other Construction Workers Welfare Board hnuiaia Welfare Fund siamah vawiin thlengin mi 19,487 an inziak lut tawh.

Akashvani Corr zawhna chhangin, MBOCWWB enkawltu Labour Employment Skill Development and Enterpreneurship Department hotute chuan MBOCWWB Welfare Fund hnuiaia hian India khua leh tui nihna diktak nei kum 18 atanga kum 60 inkar kumkhat chhunga ni 90 tal inhlawhfa te chu member an nih theih thu an sawi a, member zinga hmeichhe nau nei an awmin a lawmpuina atan MBOCWWB chuan cheng sing khat an pek thin thu leh hei hian fa pahnih an neih thleng a huam thu sawiin he lawmpuina bik hi nau neih atanga thla ruk thleng a dil theih thu an sawi a, welfare member kum 60 tling chinte tan thla tin pension cheng sang khat pek an nih thin

thu te, kum 60 tlin hma a natna khirh tak emaw avanga hnathawk theilo tan thla tin pension sang khat bakah a dinhmun a zirin cheng nuai khat thleng pek theih a nih thu an sawi bawk.

LESDE Department hotute chuan MBOCWWB Welfare Fund chu huang zau taka duan a nih thu sawiin member hnathawka chesual an awmin damdawi ina dah luh an nih chuan a luh ni atanga chhiarin nitin cheng sangkhat zel an dawng thei ang a, natna khirh zual leh accident tawk an awm a nih chuan cheng nuai khat bakah Board-in a hmathamna dang a duan an dawn theih tur thu an sawi bawk. Heng bakah hian Welfare member fate lehkhah zirna tanpuina pawh duan a nih thu LESDE Department hotute hian an sawi bawk.

(CORR)

<><><>

MAMIT JT VC

Mamit Joint Village Council memberte chuan Union Minister of State Ministry of Road Transport & Highways Pu Ajay Tamta, chu New Delhi a Office ah Pu Richard Vanlalhmangaiha, Mizoram MP Lok Sabha hovain an hmu a, NH44A/108 siamthat vat a nih theih nana Re-tender Sanction thuai turin leh Mamit District Kawngpui hrang hrangte siamthat a nih theih nan hmalaksak turin an ngen a ni.

Mamit VC te chuan Union Minister hnenah NH44A/108 chu thangkhat lian dawn siam a nih hnuah pawh la siam zawh ala nih loh avangin mipuiten nasa taka an tawrh thin thu an thlen a. A bik takin Furah inkalpawhna kawngpui a that loh avangin buaina leh harsatna an tawk nasa thin tih an thlen a ni. Mamit District chu Aspirational District a nih angin ngaihpaawimawh a pawimawh thu an thlen a ni. Mamit District kawngpui a that loh avangin khaw kar kawng inkalpawh a harsat mai bakah Red Oil Palm leh thlai dang phurchhuah a harsat bakah thil man a san phah thin thu an thlen bawk a ni.

Tun thal chhunga NH44A/108 chu a siamna tur pawisa sanction vat a nih loh chuan nakum furah tun aia a chhiat nasat dawn avangin tun thal chhung ngeia a siamna tur pawisa departmen lam in cheng vbc 166 estimate an siam chu sanction vat a nih theih nana hmalak sak turin an ngen a ni. Hei bakah hian Mamit District chhunga kawngpui hrang hrang NH No. 6 (Mamit - Bairabi) hna tan vat a nih theih nante, NH44A/108 existing road siamthat leh na tur sum sanction vat turin leh khawthlang kawngpui tha lo te siamthat a nih vat theih nan an ngen nghal bawk a ni.

MP Pu Richard Vanlalhmangaiha pawhin Mamit District chu Mizorama Aspirational District awmchhun a nih avangin khawthlang hruaitute mamawh thlen chu ngaihpaawimawh sak turin an ngen a. Mizoram chu kumkhat chhunga ruahsur hun a tam avangin tun working season ngeia NH44A/108 chu siamthat a nih theih nan theih tawp chhuah turin an ngen bawk a. Tin, Minister chu Mamit District tlawh turin an sawm nghal bawk a ni.

Pu Ajay Tamta, Union Minister MORTH chuan an thu thlente chu chak taka a lo bawhzui tur thu leh theih tawp a chhuah tur thu a sawi a, remchang hmasa berah Mizoram leh Mamit District tlawh a lo zin a tum thu a sawi bawk a ni.

(RD Darthanzauva Mamit PTC)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chaghnu dar 2 leh a chanve-ah Chanchinthar puan leh a ni ang.

(NSD)

<><><>

AH&VETY

Animal Husbandry & Veterinary Department Minister Pu C. Lalsawivunga chuan Saitual District Veterinary Hospital niman khan a hawng a, a hawna inkhawm hi District A.H & Vety Complex, Saitualah neih a ni.

He hunah hian Minister Pu C. Lalsawivunga chuan thu sawiin, Sawrkar hmasain bul a lo tan tawh Saitual District Veterinary Hospital bakah Laboratory building leh Veterinary Officer quarter hawn a ni chu lawmawm a tih thu a sawi a, Mizoram chu ran chaw, artui leh sa thianghlim lamah a intodelh lo hle tih sawiin, District Veterinary Hospital chu hemi kawnga hmasawna thlen thei tur atana pawimawh tak a ni dawn a ni, a ti. Minister chuan African Swine Fever vangin ran

vulh tuten harsatna nasa tak an tawk tih a sawi a, chutih rualin beidawng loin theihtawp an chhuah chhunzawm zel a ni, a ti.

Minister chuan sawrkar hnathawkte chu sawrkar inngahna an nih angin ngaihtuahna thar nen taima leh rinawm taka hnathawk turin a chah a, AH & Vety hospital pawh Saitual mipuite tan chhenfakawm a lo nih ngei theih nan hnathawktute pawh tha taka thawk turin a fuih nghal a ni.

He hunah hian AH & Vety department atanga thuneitute, sawrkar department hrang hranga hotute, kohhran leh khawtlang hruaitute leh tlawmngai pawlte an tel a ni.

(Rammawizuala Saitual PTC)

<><><>

CHAWNGTE P

Chawngte 'P' Platinum kum 75-na Jubilee lawmna, Lawngtlai West MLA C Pu Ngunlianchunga hovin nimin khan neih a ni a, Pu C. Nunglianchunga chuan, he khua sat eng a, dintu leh theihtawp chhuaha lo kaihrunitute zahna chibai bukin mipui kalkhawmte Platinum Jubilee chibai a buk a, Chawngte 'P' hian kum 75 hial alo tling ta a, eizawna leh zirna lamah pawh hma sawn zel tum ni se a ti.

Politics thli chhia leh tui nu a inchiah lovin, pawl, kohhran leh Party hrang hrang te pawh ni se, khawtlang tan rilru hmun khat put tur a ni a ti a. Khawtlang chu thangthar te kutah a in nghat tawh a, khawtlang hmangaih a, khawtlang tan hmasawna kawng dap zel a tul a ti.

LADC Executive Member leh Bialtu MDC nibawk Pu Andrew Laltlanzara pawhin thu sawiin, Zirna lamah hmasawn tura thahnem ngaih thar a, Khawtlang hmasawna chak leh tha zawk an neih theih nan, hna sang leh tha thawk thei turin zirlai te a fuih a, Khawtlang faina leh thianghlimna lamah chak taka hmasawn tur leh khawtlang nuam siam turin mipuite thawhho puiah a sawm.

Lawngtlai District chung, Chawngte 'P', Platinum Jubilee lawmna hun hi Chawngte 'P' Mini Sports Complex ah hman niin, Pu C. Lalhmunmawia'n a kaihruai a, He khaw sat engtu Pu Kuaichika tupa Pu Thangkhuma chuan Jubilee Lungphun a hawng a, Jubilee Organizing Sactetary Pu M. Lalhuliana'n Pu Kuaichika chanchin a sawi bawk. Zaithiam zai leh hnamlam te thlir ho a ni.

(Lalnggheta Ralte Lawngtlai PTC)

<><><>

FIT INDIA MOVEMENT

Fit India Movement puala 'Fit India Cycling Tuesday Campaign' chu Aizawl ah leh Thenzawl ah zawm vek a ni a, Sports Authority of India (SAI) leh Sports & Youth Services (SYS) bakah Mizoram Cycling Association te nen tanghovin he hun hi hman a ni..

Nimin zing khan mi 70 vel chu Aizawl Vanapa Hall kawtah pungkawmin, nitin minute 30 tal taksa sawizawi tura thutiam an chham bakah thirsakawr hmangin an intlansiak a, thutiam chhamrual hi SAI Regional Director Pu. Lianminthang chuan a kaihruai a ni.

(PR)

<><><>

AR

Nimin khan Assam Rifles chuan Lungpuk ah puanthui zirtirna a hawng a, he hunah hian Lungpuk khaw mi 20 vel te puanthui zirtir an ni.

<><><>

KISAN KAVACH

Science and Technology Minister Dr Jetendra Singh chuan nimin khan New Delhi ah India ram a anti-pesticide bodysuit hmasa ber-hlotur laka loneitute venna tur Kisan Kavach a tlangzarh.

Thuchhuah siamin Science and Technology Ministry chuan he thawmhnaw hi loneitute hlo thahna damdawi avanga harsatna an tawh thin lak a invenna tur a duan a ni a, suk theih tur a siam a ni. Kisan Kavach chu loneitute himna atan a duan niin lo neitute hnen ah Kisan Kavach suit batch hmasa ber sem a ni bawk.

(News on air)

<><><>